

Ioanes

ele laulau matamata aea

Kristus eine Posanga madonga kemi aea toa iuot masaeai

1 ¹Gai apalongo ngan Posanga madonga kemi aea. Posanga toa ne ienono matamata ngan danga toa ngada ne led otnga. Gai alongo ngan ga agera ngan matamai. Gai matamai inasi Posanga toa ne ga asibo ngan bagemai. ²Madonga kemi ipu toa ne imamado toman ngan Tamada Deo ga kus ta iuot masaeai pagai. Ta gai agera ei ta apamatua ele posanga. Ta apaola posanga pagimi ngan madonga kemi ipu toa imamado somisomi ga ilalala ga ila. ³Posanga madonga kemi aea toa gai agera ga alongo ngan ne, tota apaola ga ila pagimi. Gai apaola pagimi ngansa akim gimi pade alup kelede toman ngan gai. Be gai lemai lupnga toa ne eine toman ngan Tamada Deo ga Inat Iesus Kristus. ⁴Gai abode posanga toa ne ta iranrang ngan leda tingelgel ila iuot lai.

Manta talalala ngan taranga

⁵Gai alongo Iesus Kristus ipaola posanga, ta apaola pade ga ila pagimi ga bedane: Deo ei mambe taranga kapei. Be dodom eta ienono pan mao. ⁶Oangga takeo ga talup kelede toman ngan ei, be talalala ngan dodom, eine tapakaka. Toa bedaoa ta tanasnasi posanga tautaunga mao. ⁷Be oangga talalala ngan taranga, lalaede mambe ei imamado ngan taranga, eine talup kelede pol ngan gita, ta Deo Inat Iesus ising isamum leda kadonga sasat toa ngada oa.

⁸Oangga takeo ga leda kadonga sat eta mao, eine tapakaka gita mulian. Toa bedaoa ta posanga tautaunga ienono lolodai mao. ⁹Be oangga taoaoa ngan leda kadonga sasat, ei ga isamum leda kadonga sasat ta isigiri loloda aea muk toa ngada oa, ngansa ei eaba mata tutui aea ga

^a 1.1 Ins 1.1 ^b 1.2 Ins 1.14 ^c 1.4 Ins 16.24 ^d 1.5 1Ti 6.16, Jms 1.17 ^e 1.6 1Ilo 2.4
^f 1.8-9 Sng 32.5, Snd 28.13

inasnasi kadonga tutui. ¹⁰Oangga takeo ga bedane, “Gau nakado kadonga sat eta mao,” ngan posanga toa ne, eine mambe takeo ga Deo ei eaba pakakanga aea. Toa bedaoa ta ele posanga ienono lolodai mao.

Kristus ei gita berbeda Tamada Deo imatai

2 ¹Leg gergeu, nabode posanga toa ne ga ila pagimi ngan luanga gimiga ta akado kadonga sat mao. Be oangga eaba eta ikado kadonga sat, gita berbeda ede ta imamado Tamada Deo imatai. Ei eaba tutui tau toa Iesus Kristus. ²^hEle matenga ipatarui Deo ilolo ta iman edap ngan leda kadonga sasat aea samumnga. Be eine ngan gita kekelegita leda kadonga sasat mao. Eine edap ngan samumnga kadonga sasat togid panua toa ngada ne tanoeai.

Manta tanasnasi kadonga lalaede mambe Kristus

³Oangga tanasnasi kemi Deo ilinge, kadonga toa ne iman kilala ga ipasolan mambe gita taoatai kemi ngan ei. ⁴Oangga eaba sai ikeo ga bedane, “Gau naoatai kemi ngan ei,” be inasnasi ilinge mao, ei eaba pakakanga aea. Posanga tautaunga eta ienono iloleai mao. ⁵ⁱBe oangga sai inasnasi ele posanga, tautaunga eaba toa oa ele kadonga ngan kimnga Deo ila iuot lai. Ngan idil ga oaine taoatai mambe talup tautaunga toman ngan ei: ⁶Eaba sai ikeo ga ilup toman ngan ei ga imulmulu, manta inasnasi kadonga lalaede mambe Kristus ikakado.

⁷^jLeg panua kemikemi, apu toa nabode pagimi ne, eine pau mao. Apu toa ne mugamuga. Ienono pagimi mugaeai ga inam. Apu toa mugamuga ne eine posanga toa gimiga alongo na. ⁸^kBe apu toa nabode pagimi ne eine pau pade. Iuot tautaunga ngan Kristus ele madonga ga iuot tautaunga ngan gimiga lemi madonga pade. Ngansa dodom iuangga kus. Be taranga tautaunga ta itara ga ienono.

⁹^lOangga sai ikeo ga imamado tarangai, be ilolo paeamao ngan iuae ede pade, ei imamado dodomeai maitne. ¹⁰^mBe oangga sai ikimkim iuae ede pade, ei imamado tarangai. Danga eta toa iloleai oa ga irangrang ngan ikado ei ga itap mao. ¹¹ⁿBe eaba sai toa ilolo paeamao ngan iuae ede pade, ei imamado dodomeai ga ilalala alele dodomeai. Ei iuatai ngan ila sida mao, ngansa dodom ipadodom imata.

¹² Nabode posanga toa ne ga ila pagimi gergeu,
ngansa ei isamum lemi kadonga sasat ga kus ngan Kristus ieda.

¹³ Nabode posanga toa ne ga ila pagimi gergeu tamatamad,
ngansa aoatai kemi ngan eaba toa imamado mugaeai tau ga
irangrang ngan labone.

⁸ 2.1 Ibr 7.25-26 ^h 2.2 Ins 1.29, Kol 1.20, 1Ito 4.10 ⁱ 2.5-6 Ins 14.21,23 ^j 2.7 Ins 13.34, 2Ito 5-6 ^k 2.8 Ins 1.9, Ro 13.12 ^l 2.9 Ito 4.20 ^m 2.10 Ro 14.13 ⁿ 2.11 Ins 12.35

Nabode posanga toa ne ga ila pagimi arangaranga toa tinimi gargar,
 ngansa aeasal eaba paeamao ga kus.
 14 Nabode posanga toa ne ga ila pagimi gergeu,
 ngansa aotai kemi ngan Tamada Deo.
 Nabode posanga toa ne ga ila pagimi gergeu tamatamad,
 ngansa aotai kemi ngan eaba toa imamado mugaeai tau ga
 irangrang ngan labone.
 Nabode posanga toa ne ga ila pagimi arangaranga toa tinimi gargar,
 ngansa urami kapei,
 ga Deo ele posanga ienono lolomiaia,
 ga aeasal eaba paeamao ga kus.

Irangrang ngan loloda ikim tano toa ne mao

15^o Irangrang ngan lolomi ikim tano toa ne mao, ga gid danga sisid tanoeai aea mao pade. Oangga sai ilolo ikim tano toa ne, kadonga ngan kimnga Deo Tamada ienono pan mao. 16^p Ngansa kadonga toa ngada ne togid panua tanoeai ad, mambe kimnga papaeamao tinida aea, ga ngalenga paeamao ngan saoa danga tagera ngan matada, ga parimnga sapaean ngan leda danga sisid, gid kadonga toa ne inam pan Deo Tamada mao, be inam tanoeai ga inam. 17^q Be tano toa ne teta pade isapa ga ila toman ngan gid kimnga papaeamao tanoeai aea. Be eaba sai inasnasi Deo ele kimnga, eine ga imamado somisomi ga ilalala ga ila.

Kristus aea isat ta iuot

18^r Leg gergeu, ado muriai ga muriai tau ta inam boloma na. Mugaeai gimi alongo mambe Kristus aea isat ga inam, be labone panua busa tinam ta timan Kristus aea isat. Ta kadonga toa ne ipasolan gita mambe teta pade ado muriai ga muriai tau ga iuot. 19^s Mugaeai gid panua toa oa timamado toman ngan gita iaoa kelede ton Kristus, ga kus ta titnan gita ga tila. Be tautaunga gid pagita ad mao. Ngansa oangga gid pagita ad, eine ga tidio pagita. Be mao. Titnan gita ga tila o. Ta kadonga toa ne ipasolan gita mambe gid panua toa oa pagita ad mao.

20^t Be Deo itok Itautau Tutui ga idae ngan gimi na. Ta gimi toa ngada ne lemi oatainga imata karanga. 21 Kado gimi aoangga naeadi mambe gimi aotai ngan posanga tautaunga mao ta nabode posanga toa ne ga ila pagimi. Eine mao. Nabode ngansa gimi aotai ngan posanga tautaunga. Ga pade, gimi aotai mambe posanga tautaunga irangrang ngan ipaot posanga eta pakakanga mao. 22^u Eaba pakakanga aea sai toa? Eine eaba sai toa ikeo ga Iesus ei Kristus^v mao. Eaba toa bedane, ei ipul imur ngan Deo Tamada ga Inat pade. Tota iman

^o 2.15 Ro 8.7 ^p 2.16 Ro 13.14 ^q 2.17 Mt 7.21 ^r 2.18 Mt 24.5, 24, 2Io 7

^s 2.19 PA 20.30 ^t 2.20 1Ko 2.15, 2Ko 1.21, 2Io 2 ^u 2.22 1Io 4.3, 2Io 7 ^v 2.22 Gera palongonga ngan posanga idil *Kristus* ngan Mt 1.16.

Kristus aea isat. ^{23w}Eaba sai ipul imur ngan Deo Inat, eine ilup toman ngan Deo Tamada mao. Be eaba sai toa iuaoa masaeai mambe Iesus ei Deo Inat, eine ilup toman ngan Deo Tamada pade.

Itautau Tutui ipaoatai gita ngan posanga tautaunga

²⁴Posanga toa gimi alongo mugaeai ga inam, manta ienono lolomia. Oangga posanga toa gimi alongo mugaeai ga inam ne ienono lolomia, eine gimi ga mulmulimi pan Tamada Deo ga Inat pade. ²⁵Be ikado ele posanga tautaunga pagita ga bedane: Gita ga tamado kemi somisomi ga ilalala ga ila.

²⁶Nabode posanga toa ne ga ila pagimi ngan gid panua toa titoba ngan pabuobuonga gimi. ^{27x}Be Kristus itok Itautau Tutui ga idae ngan gimi ta ienono lolomia. Tota lemi ipu eta ngan eaba sai ipaoatai gimi mao. Ngansa Itautau Tutui ipapaoatai gimi ngan danga toa ngada ne, ga Itautau Tutui ele posanga eine tautaunga. Eine pakakanga mao. Tota gimi manta mulmulimi pan, lalaede mambe Itautau Tutui ipaoatai gimi ngan.

Gita taman Deo ele gergeu

²⁸Tota leg gergeu, gimi manta mulmulimi pan Kristus. Toa bedaoa ta oangga ei per ga iuot masaeai ngan ado toaiua iluai mulian ga inam, eine ga tamataud mao, ga maeamaea gita mao pade.

^{29y}Oangga gimi aoatai mambe Kristus ele kadonga itutui tau, aoatai pade mambe panua toa ngada ne tinasnasi kadonga tutui eine timan Deo ele gergeu.

3 ^{1z}Panamon! Tamada Deo iuato gita ele gergeu! Ngan kadonga toa bedane, ei ipasolan mambe ei ikim gita kapei ga kapei tau. Ta gita taot ele gergeu tautaunga. Ngan ipu toaine, gid panua tanoeai ad tiuatai ngan gita mao, eine ngansa tiuatai ngan ei mao. ^{2a}Leg panua kemikemi, tautaunga gita Deo ele gergeu. Be muriai gita taot madongan, eine taoatai maitne. Be gita taoatai, muriai oangga Kristus iuot masaeai, eine ga taot lalaede mambe ei, ngansa gita ga tagera imata tautaunga. ³Be sapadua tiuatai kemi ngan danga toa ne ga tisangasanga ei ngan, eine tisigiri lolod ta aea muk eta mao, lalaede mambe ei ilolo aea muk eta mao.

⁴Panua sapadua tikado kadonga sat, eine titnan Deo ele apu na. Be kadonga sat eine kadonga ngan tnannga Deo ele apu. ^{5b}Gimi aoatai mambe Kristus isulug ga inam tanoeai ngan samumnga kadonga sasat. Be tautaunga ei ele kadonga sat eta mao. ⁶Eaba sai toa ilup toman ngan ei, ei inasnasi kadonga sat ga ilalala ga ila mao. Be eaba sai toa inasnasi

^w 2.23 Ins 5.23, 1Io 4.15, 5.1 ^x 2.27 Ins 16.13 ^y 2.29 1Io 3.10 ^z 3.1 Ins 1.12-13, 16.3

^a 3.2 2Ko 3.18 ^b 3.5 Ins 1.29, 1Pe 2.22-24, 1Io 2.2

kadonga sat ga ilalala ga ila, tautaunga igera ei mao, ga iuatai ngan ei mao pade.

⁷Leg gergeu, alongean eaba eta ipabuobuo gimi mao. Eaba sai toa inasnasi kadonga tutui, ei eaba tutui, lalaede mambe Kristus ei eaba tutui. ^{8c}Eaba sai toa inasnasi kadonga sat, ei inam pan eaba paeamao. Ngansa mugaeai tau ga inam, eaba paeamao ikakado kadonga sasat. Be ngan ipu ga oaine Deo Inat isulug ga inam tanoelai, eine ngan ipaeabu ngan eaba paeamao ele naurata. ^{9d}Be eaba sai toa iuot Deo ele gergeu, ei inasnasi kadonga sat mao. Ngansa Deo Itautau ienono pan eaba toa oa mambe annga ipuapua iarum iloleai. Tota irangrang ngan inasnasi kadonga sat mao, ngansa ei Deo ele gergeu. ¹⁰Ngan idil ga oaine taoatai ngan sapadua timan Deo ele gergeu ga sapadua timan eaba paeamao ele gergeu: Eaba sai toa inasnasi kadonga tutui mao, ei inam pan Deo mao. Be eaba sai toa ikimkim iuae ede pade mao, ei pade inam pan Deo mao.

Iesus ipasolan gita ngan kadonga kimnga aea tautaunga

^{11e}Ngansa posanga toa gimi alongo mugaeai ga inam, eine ga bedane: Manta tanasnasi kadonga kimnga aea pol ngan gita. ¹²Irangrang ngan tanasi Kain ele kadonga mao. Ei inam pan eaba paeamao ta irau aea kakau ga imate. Be ikamado ga irau ei ga imate? Eine ngansa ei ele kadonga paeamao, be aea kakau ele kadonga itutui. ^{13g}Oaeoag, oangga gid panua tanoelai ad lolod paeamao ngan gimi, irangrang ngan atogragimi mao. ^{14h}Leda kadonga ngan kimnga oaeoaeda padengada ipasolan mambe tatnan matenga ga idio, ta tala tabada madonga kemi. Be eaba sai toa inasnasi kadonga kimnga aea mao, ei idio maitne mambe eaba imate. ¹⁵ⁱBe eaba sai toa ilolo paeamao ngan iuae ede pade, ei lalaede mambe eaba ipapamate panua. Be gimi aoatai mambe eaba sai toa ipapamate panua, ei ibada madonga kemi somisomi aea mao.

^{16j}Gita taoatai mambe kadonga kimnga aea eine saoa danga, ngansa Iesus Kristus ilongean ei mulian ga imate ngan luanga gita. Toa bedaoa ta gita pade manta talongean gita mulian ga tamate ngan luanga oaeoaeda padengada. ^{17k}Be oangga sai ele danga sisid tanoelai aea ienono, ga igera iuae ede pade toa ele danga sisid imata karanga mao, be ilolo isat ngan ei mao, eine taoatai, Deo ele kadonga kimnga aea ienono pan eaba toa oa mao. ^{18l}Leg gergeu, irangrang ngan takeo sapaeen ngan aoada mambe takimkim oaeoaeda padengada mao. Be manta takimkim gid tautaunga ngan leda kadonga.

Gita tarangrang ngan loloda pu ga tamadmadid Deo imatai

¹⁹Oangga takimkim oaeoaeda, eine taoatai kemi mambe tanasnasi posanga tautaunga. Oangga bedaoa, tapamatua loloda ta loloda itarui

^c 3.8 Ins 8.44 ^d 3.9 1Io 5.18 ^e 3.11 Ins 13.34 ^f 3.12 OM 4.8 ^g 3.13 Ins 5.18-19

^h 3.14 Ins 5.24 ⁱ 3.15 PM 21.8 ^j 3.16 Ins 13.1, Gal 1.4 ^k 3.17 Lo 15.7

^l 3.18 Jms 2.15-16

Deo imatai. ²⁰Goibe danga etangada igalgal loloda, be loloda itarui maitne, ngansa Deo iuatai ngan danga toa ngada ne, ga ele oatainga iasal tau oatainga isaoa ienono lolodai.

²¹Leg panua kemikemi, oangga danga eta igalgal loloda mao, eine loloda pu ga tamadmadid Deo imatai. ²²Be saoa danga tabeta ei ngan, eine tabada, ngansa talongolongo ilinge ga tanasnasi gid kadonga toa ikado ei ga itin igelgel. ²³Be ele posanga ga bedane: Manta loloda matua mambe Iesus Kristus ei Deo Inat. Ga pade, manta tanasi kadonga kimnga aea pol ngan gita, lalaede mambe irenren pagita ngan. ²⁴Eaba sai inasnasi ele posanga, ei imamado pan Deo, ga Deo imamado pan eaba toa oa. Be taoatai mambe Deo imamado pagita tautaunga madongan? Eine taoatai ngansa ibada Itautau Tutui ga inam pagita.

Matada inasi posanga tautaunga ga posanga pakakanga

4 ¹Leg panua kemikemi, panua sapadua tikeo ga Itautau Tutui ibada posanga pagid, irangrang ngan aeadi gid toa ngada oa led posanga mao. Be manta atoba gid ta aoatai, tautaunga led posanga inam pan Deo, mao madongan. Ngansa panua busa tilalala alele ngan tibur toa ngada ne tanoeai ta tikeo ga tibada Deo iaoa, be tipakaka. ²Ngan idil ga oaine irangrang ngan aoatai mambe Deo Itautau Tutui imamado pagid: Oangga tikeo ga Iesus Kristus iuot eababa tautaunga, eine led posanga inam pan Deo. ³Be oangga eaba eta ikado posanga bedane ngan Iesus mao, eaba toa oa inam pan Deo mao. Eine Kristus aea isat. Gimi alongo mambe Kristus aea isat uangga inam, be patautene inam tanoeai ta imamado.

⁴Leg gergeu, gimi anam pan Deo ta aeasal gid, ngansa Itautau Tutui toa imamado lolomiaie eine iasal eaba paeamao toa imamado pagid panua tanoeai ad. ⁵Gid panua toa oa tanoeai ad, ta ngan ipu toaine tikado posanga imata ede ga ede tanoeai aea, ta gid panua tanoeai ad tilongolongo gid. ⁶Be gita tanam pan Deo, ta eaba sai toa iuatai kemi ngan Deo, eine ilongolongo gita. Be eaba sai toa inam pan Deo mao, eine ilongolongo gita mao. Ngan idil toaine, taoatai ngan posanga tautaunga toa inam pan Itautau Tutui, ga posanga pakakanga toa inam pan eaba paeamao.

Eaba sai ikim Deo, ei manta ikimkim iuaeuae padengada

⁷Leg panua kemikemi, manta tanasi kadonga kimnga aea pol ngan gita. Ngansa kadonga kimnga aea inam pan Deo. Ga pade, eaba sai toa inasnasi kadonga kimnga aea, ei Deo ele gergeu ga iuatai kemi ngan Deo. ⁸Eaba sai toa inasi kadonga kimnga aea mao, ei iuatai ngan Deo

^m 3.21 Ibr 4.16 ⁿ 3.23 Ins 6.29, 13.34 ^o 3.24 1Ito 4.13 ^p 4.1 Mt 7.15, 1Te 5.21, 1Ito 2.18, 2Ito 7 ^q 4.2 1Ko 12.3 ^r 4.3 1Ito 2.18 ^s 4.4 Mt 12.29, 1Ito 5.4-5 ^t 4.5-6 Ins 8.47, 15.19

mao, ngansa Deo ei kadonga kimnga aea ipu. ⁹Deo ipasolan ele kadonga kimnga aea pagita ga bedane: Ei isula Inat toa kelede oa ga inam tanoelai, ngansa ikim gita tabada madonga kemi tautauga. ¹⁰Irangrang ngan taeadi mambe gita tapamuga leda kadonga kimnga aea ngan Deo mao. Eine mao. Be ei ipamuga ele kadonga kimnga aea ngan gita, ta isula Inat ga imate ngan leda kadonga sasat. Ta Inat ele kadonga toa ne ipatarui Itama ilolo mulian. Kadonga kimnga aea tautauga tota bedaoa. ¹¹Leg panua kemikemi, oangga Deo ikim gita kapei toa bedane, gita pade manta tanasi kadonga kimnga aea pol ngan gita. ¹²Eaba eta igera Deo ngan imata mao. Be oangga tanasi kadonga kimnga aea pol ngan gita, Deo imamado pagita, ta ele kadonga kimnga aea ienono lolodai ga ila iuot lai.

¹³Ngan idil ga oaine gita taoatai mambe ei imamado pagita ga gita tamamado pan: Eine ngansa ipota anada ngan Itautau Tutui. ¹⁴Be gita tagera mambe Deo Tamada isula Inat ga inam ngan badanga mulian panua toa ngada ne tanoelai. Ta gita tapamatua posanga toa ipasolan pagita ne. ¹⁵Oangga sai iuaoa masaeai mambe Iesus ei Deo Inat, eine Deo imamado pan, ga eaba toa oa imamado pan Deo pade. ¹⁶Ta gita taoatai kemi ga loloda matua mambe Deo ikim gita kapei tau. Ta kadonga kimnga aea toa ne ienono lolodai.

Deo ei kadonga kimnga aea ipu. Oangga sai imulmuli ngan kadonga kimnga aea, eine imulmuli pan Deo, ga Deo pade imulmuli pan. ¹⁷Ngan edap toa ne leda kadonga kimnga aea ila iuot lai, ta irangrang ngan loloda pu ga tamataud mao ngan ado toaiua Deo ipamadid panua toa ngada ne ngan posanga. Ngansa leda kadonga rabu ngan panua tanoelai ad, eine lalaede mambe Kristus ele kadonga. ¹⁸Eaba sai inasnasi kadonga kimnga aea, ei imataud danga eta mao. Be oangga kadonga kimnga aea ila iuot lai, eine ipamate mataudnga. Ngansa eaba sai imataud, eine iadi mambe Deo ga ipanas ei. Tota oangga sai imataud, eine taoatai, ele kadonga kimnga aea imata karanga maitne.

¹⁹Gita tanasnasi kadonga kimnga aea ngansa Deo ikim gita mugaeai. ²⁰Oangga sai ilolo paeamao ngan iuae ede pade be ikeo ga bedane, “Gau nakimkim Deo,” eaba toa oa pakakanga aea. Ngansa eaba sai ikim iuae ede pade mao, eine irangrang ngan ikim Deo mao pade. Ngansa ei igera Deo ngan imata mao. Somisomi igera iuae ede pade, be ikim ei mao. ²¹Be Deo ele posanga toa ibada pagita eine ga bedane: Eaba sai toa ikimkim Deo, ei manta ikimkim iuae ede pade.

^u 4.9 Ins 3.16 ^v 4.10 Ro 5.8-10, 1IJo 2.2 ^w 4.12 Ins 1.18 ^x 4.13 2Ko 1.22, 1IJo 3.24
^y 4.21 Mk 12.29-31

Ngan leda kadonga lolo matua aea, taesal eaba paeamao

5 ^{1z}Panua sapadua lolod matua mambe Iesus ei Kristus^a, gid tiuot Deo ele gergeu. Be panua sapadua tikimkim gergeu tamad, eine tikimkim gid gergeu pade. ²Oangga takimkim Deo ga tanasnasi ilinge, eine taoatai tautaunga mambe takimkim gid ele gergeu pade. ^{3b}Ngansa kadonga ngan kimnga Deo eine ga bedane: Manta tanasnasi ilinge. Be ele posanga aea nasinga eine kulupu ngan gita mao. ⁴Ngansa sapadua timan Deo ele gergeu, eine tiasal eaba paeamao toa imadid ga imugamuga ngan tano toa ne. Be leda edap ngan easalnga tano toa ne aea madidnga, eine leda kadonga lolo matua aea. ⁵Be sapadua tiasal tano toa ne aea madidnga? Eine gid panua toa lolod matua mambe Iesus ei Deo Inat.

Deo ipaola posanga masaeai ngan Inat

^{6c}Iesus Kristus ei eaba toa inam tanoelai ta ibada paliliunga ngan eau ga ngan ising toa itoki ngan abei tabala. Ei ibada paliliunga ngan eau kekelen mao. Be ibada paliliunga ngan eau ga ising pade. Be Itautau Tutui ipamatua aea posanga toa ne pade. Ngansa Itautau Tutui ei eaba posanga tautaunga aea. ⁷Ngansa idil tol ienono ngan pamatuanga Iesus aea posanga: ^{8d}Eine Itautau Tutui ga eau ga sing. Be idil toa tol ne tikado posanga lalaede. ^{9e}Gita taeadi posanga togid eababa ngan saoa danga tigera ngan matad. Be posanga toa Deo ikakado ngan gid danga toa ei igera ngan imata, eine iasal posanga togid eababa, ngansa eine Deo ele posanga toa ikado ngan Inat. ^{10f}Eaba sai ilolo matua ngan Deo Inat, posanga toa Deo ikado ne ienono iloleai. Be eaba sai ilolo matua ngan Deo ele posanga mao, eine mambe iuato Deo eaba pakakanga aea. Ngansa ei iadi posanga toa Deo ikado ngan Inat oa mao. ¹¹Be posanga toa Deo ikado ne, eine ga bedane: Deo ibada madonga kemi somisomi aea pagita. Be madonga kemi toa ne inam pan Inat. ^{12g}Eaba sai toa ibada Deo Inat, ei ibada madonga kemi toa ne. Be eaba sai toa ibada Deo Inat mao, ei ibada madonga kemi toa ne mao.

Tarangrang ngan taoatai mambe gita tabada madonga kemi

^{13h}Gau nabode gid posanga toa ne ga ila pagimi panua toa lolomi matua ngan Deo Inat ieda, ngansa nakim aoatai kemi mambe gimi abada madonga kemi somisomi ga ilalala ga ila. ¹⁴ⁱOangga tabeta Deo ngan saoa danga toa inasi ele kimnga, eine taoatai mambe ilongo gita. Loloda pu tota bedaoa ta tala boloma pan. ¹⁵Be oangga taoatai kemi mambe ei

^z 5.1 1Ia 4.15 ^a 5.1 Gera palongonga ngan posanga idil *Kristus* ngan Mt 1.16.

^b 5.3 Ins 14.15,23-24 ^c 5.6 Ins 1.29-34 ^d 5.8 Ins 15.26 ^e 5.9 Ins 5.32-37

^f 5.10 Ins 5.36-40 ^g 5.12 Ins 3.36 ^h 5.13 Ins 20.31 ⁱ 5.14 Ins 14.13-14, 1Ia 3.21-22

ilongo gita ngan saoa danga tabeta ei ngan, eine taoatai pade mambe gita tabada saoa danga toa tabeta ei ngan.

^{16j}Oangga eaba eta igera iuae ede pade ikado kadonga sat, be kadonga sat toa oa iranrang ngan idada ei ga ila ngan dinga imperno mao,^k kemi ngan ibeta Deo ta ibada madonga kemi pan eaba toa oa. Gid panua toa tikado kadonga sat, be iranrang ngan idada gid ga tila ngan dinga imperno mao, tiranrang ngan tibada madonga kemi. Be kadonga sat ede iranrang ngan idada panua ga tila ngan dinga imperno. Eine nakeo ga gimi manta abeta Deo ngan gid panua led kadonga sat toa bedaoa mao. ¹⁷Kadonga isaoa itutui mao, eine kadonga sat. Be kadonga sat edengada iranrang ngan idada panua ga tila ngan dinga imperno mao.

^{18l}Gita taoatai, panua sapadua tiuot Deo ele gergeu tiranrang ngan tikado kadonga sat ga ilalala ga ila mao. Be Deo Inat imariala ngan gid ta iranrang ngan eaba paeamao ipaeabu ngan gid mao. ¹⁹Gita taoatai mambe gita tanam pan Deo, be tibur toa ngada ne tanoeai ienono eaba paeamao ibageai. ²⁰Be taoatai mambe Deo Inat inam ngan paoatainga gita, ta iranrang ngan taoatai kemi ngan Deo tautaunga. Be gita talup toman ngan Deo tautaunga toa ne ga Inat Iesus Kristus pade. Ei kekelen Deo tautaunga ga iman edap ngan badanga madonga kemi somisomi aea.

²¹Leg gergeu, gimi manta agabit kemi ga ala aluai ngan gid deo pakakanga ad.

^j 5.16 Mt 12.31 ^k 5.16 Ngan posanga Grik, posanga idil toa ne *kadonga sat idada ei ga ila ngan dinga imperno* eine ga bedane: *kadonga sat idada ei ga ila ngan matenga*, be posanga idil toa ne iposaposa ngan led matenga parua aea. Gera posanga ngan PM 21.8. ^l 5.18 llo 3.9